

VENDIM
Nr.795, datë 22.7.2009

**PËR HAPJEN E PROGRAMIT TË RI TË STUDIMIT, PRANË SHKOLLËS SË LARTË
UNIVERSITARE, PRIVATE “KRISTAL” DHE HAPJEN E FILIALIT NË QYTETIN E
KUKËSIT**

Në mbështetje të nenit 100 të Kushtetutës dhe të neneve 4, pika 2, 43, 44 e 45 të ligjit nr.9741, datë 21.5.2007 “Për arsimin e lartë në Republikën e Shqipërisë”, të ndryshuar, me propozimin e Ministrit të Arsimit dhe Shkencës, Këshilli i Ministrave

VENDOSI:

1. Hapjen e programit të studimit, të ciklit të parë, në “Mësuesi për arsimin fillor”, në formën e studimeve me kohë të plotë, pranë shkollës së lartë universitare, private, “Kristal”, Tiranë.

2. Kohëzgjatja normale e programit të studimit, të ciklit të parë, të jetë 3 (tri) vite akademike, me plotësimin, së paku, të 180 krediteve. Në përfundim të këtij programi studimi lëshohet diplomë e nivelit të parë (DNP) në “Mësuesi për arsim fillor”.

3. Hapjen e të njëjtit program studimi, të ciklit të parë, në formën e studimeve me kohë të plotë, në “Mësuesi për arsimin fillor”, në filialet e qytetit të Fierit dhe të qytetit të Korçës.

4. Hapjen në qytetin e Kukësit, të filialit të këtij universiteti, të Fakulteteve të Drejtësisë, të Shkencave Politike, të Infermierisë dhe të Administrim-biznesit, si pjesë përbërëse e shkollës së lartë universitare, private, “Kristal”, Tiranë.

5. Hapjen e programeve të studimit të ciklit të parë, në formën e studimeve me kohë të plotë, në filialin e Kukësit, në:

- a) Drejtësi;
- b) Marrëdhënie ndërkombëtare;
- c) Shkenca komunikimi;
- ç) Psikologji;
- d) Infermieri;
- dh) Menaxhim biznesi;
- d) Financë.

6. Programet e studimit, të përcaktuara në pikat 3 e 5 të këtij vendimi, të jenë të njëta me programet e studimit, që shkolla e lartë universitare, private, “Kristal”, ofron në selinë qendrore të saj në Tiranë. Ato do të realizohen me 18 kredite dhe kohëzgjatja e tyre do të jetë 3 (tri) vite akademike. Në përfundim të programeve të studimeve lëshohet diploma e nivelit të parë (DNP), përkatësisht në:

- a) Drejtësi;
- b) Marrëdhënie ndërkombëtare;
- c) Shkenca komunikimi;
- ç) Psikologji;
- d) Infermieri;
- dh) Menaxhim biznesi;
- d) Financë.

7. Ngarkohet shkolla e lartë universitare, private, “Kristal”, që, për çdo program studimi, të sigurojë, nëpërmjet marrëdhënieve kontraktuale, zhvillimin e disa prej disiplinave kryesore formuese të specialitetit, pas vitit të parë, nga një personel akademik i huaj, me kualifikimin e nevojshëm.

8. Shkolla e lartë universitare, private, “Kristal”, ta fillojë veprimtarinë mësimore për programet e studimit, të përcaktuara në këtë vendim, pasi të ketë marrë, jo më vonë se dy javë para fillimit të veprimtarisë mësimore, lejen përkatëse nga ministri i Arsimit dhe Shkencës.

Ministri e lëshon lejen pasi vlerëson se institucioni mësimor ka përmbushur angazhimet e deklaruara, në përputhje me udhëzimin e tij për këtë qëllim.

9. Ndryshimet në vendndodhje, plane, forma studimi dhe programe, si dhe në elemente të tjera, të miratuara, bëhen pas miratimit nga Ministria e Arsimit dhe Shkencës.

10. Shkolla e lartë universitare, private, “Kristal”, duhet t’i nënshtrohet procesit të akreditimit institucional të këtyre programeve, brenda afateve të përcaktuara në ligjin në fuqi.

11. Ngarkohet Ministria e Arsimit dhe Shkencës për kontrollin periodik të ligjshmërisë në institucion dhe për zbatimin e këtij vendimi.

Ky vendim hyn në fuqi pas botimit në Fletoren Zyrtare.

KRYEMINISTRI

Sali Berisha